



## Նար-Դոս

### Սպանված աղավնին

Արարված առաջին

Մարգարյանի սենյակը համեստ, բայց ճաշակավոր կահավորանքով: Դիմացը երկու դուռ, ձախ դուռը տանում է դեպի նախասենյակ, աջ դուռը՝ դեպի ննջարան: Ձախ կողմը՝ երկու լուսամուտ, գրքերի պահարան և գրասեղան, գրասեղանի վրա գրքեր, թղթեր, գրության պարագաներ և լամպ՝ կապույտ լուսամփոփով: Աջ կողմը՝ գահավորակ, երկու բազկաթոռ և կլոր սեղան, սեղանի վրա ալբոմ և մեծ լամպ: Պատերին նկարներ: Ուր հարկն է՝ աթոռներ:

Գիշեր է: Սենյակը մութն է: Լսվում է դռան գանգակի ձայնը: Երկար միջոց անցնելուց հետո մտնում են ձախ դռնից Թաթոսը և Թուսյանը: Վերջինիս ձեռքին մի մեծ, ջարդված ճամպրուկ:

#### ՏԵՄԻԼ I

**ԹՈՒՍՅԱՆ.** Աղա, մի ճրագ վառի, է՛, գատ չեմ տեսնում:

**ԹԱԹՈՍ.** Էսա վառում եմ (Վառում է կլոր սեղանի վրա դրած լամպը և հետաքրքրությամբ դիտում է հյուրին):

**ԹՈՒՍՅԱՆ.** (Ճամպրուկը դնում է դռան մոտ, անկյունում, հետո հանում է վերարկուն և ձգում ճամպրուկի վրա): Բա ասում ես գիդում չե՞ս կգա աղեղ:

**ԹԱԹՈՍ.** Գիդում չեմ: Հնի սրհաթի քա՞նին ա:

ԹՈՒՍՅԱՆ. Սըհաթ չունեն: Տասը կըլի: (Գլխարկը ձգում է վերարկուի վրա):

ԹԱԹՈՍ. Դե որ տասը կըլի, էնա շուտով կգա:

ԹՈՒՍՅԱՆ. (Նստում է բազկաթոռի վրա և սենյակը դիտում): Էս մի օթախն ա՞:

ԹԱԹՈՍ. Չէ, մի՞նն էլ հրեն ընդեղ ա:

ԹՈՒՍՅԱՆ.- Է՞ն ինչ ա:

ԹԱԹՈՍ. Ընդեղ ա քնում:

ԹՈՒՍՅԱՆ. (Հորանջում է. բաց է անում ալբոմը և անուշադրությամբ թերթում, հետո ալբոմը ծածկում է և նայում Թաթոսին): Անունդ ի՞նչ ա:

ԹԱԹՈՍ. Թաթոս:

ԹՈՒՍՅԱՆ. Պապիրոս չես քաշո՞ւմ:

ԹԱԹՈՍ.- Չէ:

ԹՈՒՍՅԱՆ. (Ուզում է հանել ձախ ոտի երկարաճիտ կոշիկը, որը դժվարությամբ է դուրս գալիս): Խի՞ չես քաշում:

ԹԱԹՈՍ. Դե սովոր չեն:

ԹՈՒՍՅԱՆ. (Ոտը երկարացնում է դեպի նա): Քե մատաղ, մի քաշի էս անտերը, մագոլը հոգիս հանեց (Թաթոսն սկսում է քաշել կոշիկը): Օ՛յ, կամաց... Հուպ մի տա... Հա՛, ըդենց... (Թաթոսը հանում է կոշիկը և դնում է բազկաթոռի կողքին): Է՛, Օ՛ֆ, մի քիչ դնջացա: (Տրորում է ոտը: Միջոց): Թաթոս ջան, գիդա՞ս ինչ կա. ինձ որ մի քիչ ուտելու բան տաս, է՛, հոգիդ դյուզ արքայություն կգնա: Խա՛ջ:

ԹԱԹՈՍ. Ո՞րդիան տամ:

ԹՈՒՍՅԱՆ.- Բա տանը գատ չկա՞:

ԹԱԹՈՍ. Խի՞ չկա, ամա կողպած ա բուֆետու՞մը:

ԹՈՒՍՅԱՆ. Բաց չի ըլի՞:

ԹԱԹՈՍ. Բնալիքն աղի մոտն ա:

ԹՈՒՍՅԱՆ. Բա մի պատառ հաց ու պանիր...

ԹԱԹՈՍ. Հաց ու պանիրն էլ ա կողպած, հլա ամեն բան էլ:

ԹՈՒՍՅԱՆ. Մի թաա չայ էլ չես տա՞:

ԹԱԹՈՍ. Չայ շաքարն էլ ա կողպած:

ԹՈՒՍՅԱՆ. Բա ո՞նց անենք: (Միջոց: Հորանջում է): Համ սոված եմ, համ քունս տանում ա:

ԹԱԹՈՍ. Ուզում ես, հլա քնի, եննա աղեն որ կգա, իրան կասես:

ԹՈՒՍՅԱՆ. Դե ըտենց պտի անենք, է՛լի: (Վեր է կենում, վերցնում կոշիկը և դիմում դեպի ննջարան): Որ գա, վեր կկացնես:

ԹԱԹՈՍ. Յավաշ, աղա, լիս անեն: (Վերցնում է լամպը, առաջնորդում է Թուսյանին դեպի ննջարան, հետո դուրս է գալիս այնտեղից, լամպը դնում յուր տեղը, հանգնում և դուրս գնում ձախ դռնից: Երկար միջոց անցնելուց հետո ձախ դռնից մտնում է Մարգարյանը, վառում գրասեղանի վրա դրված լամպը, նստում և սկսում է պարապել: Կարճ ժամանակից հետո լսվում է դռան գանգակի ձայնը):

## ՏԵՄԻԼ II

ՄԱՐԳԱՐՅԱՆ. (Ընդհատում է պարապմունքը): Ո՞վ կարող է լինել: (Ականջ է դնում դեպի նախասենյակ, սպասելով որ ծառան կգա դուռը բանալու: Չանգակը նորից հնչում է): Շնթե՛լ է անպիտանը, չի իմանում: (Գնում է դուռը բանալու և կարճ ժամանակից վերադառնում է Միսակյանի հետ): Արի տեսնենք այդ ի՞նչ քամի է խելքիդ փչել այս ժամին գալու ինձ մոտ:

ՄԻՍԱԿՅԱՆ. (Խիստ ուրախ տրամադրության մեջ): Օ՛հ, որ իմանաս, ի՞նչ քամի, ի՞նչ քամի...

ՄԱՐԳԱՐՅԱՆ. (Չարնացած դիտում է նրա դեմքը): Դու հարբած ես:

ՄԻՍԱԿՅԱՆ. Այն, ինչպես ասում են՝ մի քիչ քեփով եմ:

ՄԱՐԳԱՐՅԱՆ. Դու չես խմում ախր:

ՄԻՍԱԿՅԱՆ. Բայց այսօր խմեցի՛, խմեցի՛...

ՄԱՐԳԱՐՅԱՆ. Ո՞րտեղ:

ՄԻՍԱԿՅԱՆ. Նշանածիս տանը:

ՄԱՐԳԱՐՅԱՆ.- Ի՞նչ...

ՄԻՍԱԿՅԱՆ. Այս երեկո նշանվեցի, շնորհավորիր:

ՄԱՐԳԱՐՅԱՆ. (Շարունակ նայում է նրա աչքերին զարնացած): Ցնդվե՞լ ես, ինչ է:

ՄԻՍԱԿՅԱՆ. Ա՛յ, թե չես հավատում: (Ցույց է տալիս ձեռքի մատանին):

ՄԱՐԳԱՐՅԱՆ. (Դեռևս չհավատալով): Հանաք չե՞ս անում:

ՄԻՍԱԿՅԱՆ. Չէ, է՛լի, վահ: Տե՛ս:

ՄԱՐԳԱՐՅԱՆ. (Խիստ հետաքրքրված): Սպասիր: Արի նստիր այստեղ: (Նստում եի գրասեղանի մոտ): Այդ ե՞րբ, ի՞նչպես: Ո՞վ է աղջիկը:

ՄԻՍԱԿՅԱՆ. (Հիասքանչունով): Մի հրաշալի աղջիկ, մի աննման աղջիկ...

ՄԱՐԳԱՐՅԱՆ. Սիրահարվա՞ծ էիր:

ՄԻՍԱԿՅԱՆ. Չէ: Ես մինչև անգամ այս երեկո տեսա նրան առաջին անգամ:

ՄԱՐԳԱՐՅԱՆ. Աղջկա՞ն:

ՄԻՍԱԿՅԱՆ.- Այո:

ՄԱՐԳԱՐՅԱՆ. Նրա՞ն, որի հետ նշանվե՞լ ես:

ՄԻՍԱԿՅԱՆ. Այո...

ՄԱՐԳԱՐՅԱՆ. Գժվե՞լ ես, ի՞նչ է:

ՄԻՍԱԿՅԱՆ. Ինչո՞ւ:

ՄԱՐԳԱՐՅԱՆ. Ի՞նչպես թե ինչու: Կարելի բա՛ն է մի՞թե՛ առաջին անգամ տեսնել աղջիկը և հենց առաջին անգամից էլ նշան տալ:

ՄԻՍԱԿՅԱՆ. Ինչո՞ւ չի կարելի: Մեծ մասամբ այդպես են ամուսնանում:

ՄԱՐԳԱՐՅԱՆ. Այո, հասարակ դասակարգի մարդիկ տգետ արհեստավորները, խանութպանները, բանվորները... Բայց դու ինտելիգենտ մարդ ես:

ՄԻՍԱԿՅԱՆ. Դա դատարկ բան է: Մերն ինտելիգենտ և հասարակ դասակարգի մարդ չի հարցնում:

ՄԱՐԳԱՐՅԱՆ. Մինչև անգամ սիրահարվե՞լ ես:

ՄԻՍԱԿՅԱՆ. Եվ ի՞նչպես...

ՄԱՐԳԱՐՅԱՆ. Ի՞նչ ես ասում... Տո՛, մի գիշերո՞ւմ, մի քանի ժամվա ընթացքո՞ւմ...

ՄԻՍԱԿՅԱՆ. Տեսնելուն պես: Ես մի տեղ կարդացել եմ, որ սիրահարվում են առաջին իսկ վայրկյանից, առաջին իսկ հայացքից:

ՄԱՐԳԱՐՅԱՆ. Եվ այդ հիման վրա՞ ես կարծում, թե սիրահարվել ես:

ՄԻՍԱԿՅԱՆ. Ոչ թե կարծում, այլ իսկապես սիրահարվել եմ: Աստված է վկա:  
Միրահարված որ չլինեմ, այս ժամին ինչո՞ւ պետք է գայի քեզ մոտ: Տուն գնացի,  
բայց մենակ սիրտս չդիմացավ և դուրս եկա:

ՄԱՐԳԱՐՅԱՆ. Լավ: Հետո նա՞:

ՄԻՍԱԿՅԱՆ. Ո՞վ, Սառա՞ն:

ՄԱՐԳԱՐՅԱՆ. Անունը Սառա է՞:

ՄԻՍԱԿՅԱՆ. Այո:

ՄԱՐԳԱՐՅԱՆ. Հետո Սառա՞ն, հավանե՞ց քեզ:

ՄԻՍԱԿՅԱՆ. (Հանկարծակի եկած): Հը՞... (Շփոթվում է, նախ չիմանալով ինչ  
պատասխան տա, հետո հանկարծ վրա է բերում ինքնավստահորեն): Իհարկե,  
եթե նշանս ընդունեց, կնշանակի հավանել էր:

ՄԱՐԳԱՐՅԱՆ. Վնաս չունի, թեև սիրահարված ես, բայց և այնպես լոգիկայով  
ես խոսում: Բայց ինձ ասա տեսնեմ ի՞նչպիսի աղջիկ է:

ՄԻՍԱԿՅԱՆ. Շատ խելոք աղջիկ է: Ինձնից էլ խելոք:

ՄԱՐԳԱՐՅԱՆ. Ասենք քեզնից խելոք լինելը մի մեծ առավելություն չէ մինչև  
անգամ մի աղջկա համար...

ՄԻՍԱԿՅԱՆ. Քեզնից էլ խելոք կլինի:

ՄԱՐԳԱՐՅԱՆ. (Ծիծաղում է): Ա՛յ, այդ ուրիշ բան է...

ՄԻՍԱԿՅԱՆ. Աստված է վկա:

ՄԱՐԳԱՐՅԱՆ. (Շարունակելով ծիծաղը): Հիմար, ինչո՞ւ ես երդվում, կարծում  
ես չեմ հավատո՞ւմ... (Լուրջ): Հետո... ինչ էի ուզում հարցնել... Հա՛, սիրո՞ւն է:

ՄԻՍԱԿՅԱՆ. (Հիասքանչունով): Օ՛, չափազա՛նց, չափազա՛նց...

ՄԱՐԳԱՐՅԱՆ. Կարո՞ղ ես նկարագրել նրա արտաքինը:

ՄԻՍԱԿՅԱՆ. Կարող եմ, բայց չեմ նկարագրի:

ՄԱՐԳԱՐՅԱՆ. Ինչո՞ւ:

ՄԻՍԱԿՅԱՆ. Որովհետև... Դու կարդացե՞լ ես երևելի հումորիստ Սուրենի ինքնակենսագրությունը:

ՄԱՐԳԱՐՅԱՆ. Չէ:

ՄԻՍԱԿՅԱՆ. Նա սիրահարված է լինում մի աղջկա վրա և ուզում է այդ աղջկա նկարագիրը տալ ընթերցողին, բայց դրա փոխարեն տալիս է յուր գրքի մեջ մի դատարկ երես՝ ներքևը գրած այսպիսի ծանոթությամբ. «Թող. ասում է, այս դատարկ երեսի վրա ամեն մի ընթերցող յուր առաջին սիրո առարկայի արտաքին տեսքը նկարագրի: Ես վախենում եմ, ասում է, որ ընթերցողներս չհավանեն իմ նկարագիրը: Եթե ասեմ, որ իմ սիրած աղջիկը շիկահեր էր, սևահեր կին սիրողը կասի՝ «Լա՛վ, ի՛նչ մի գեղեցիկ բան է շեկ մազերը»: Եթե ասեմ, որ նրա մազերը սև էին սաթի պես, քիթները վեր կքաշեին ոսկեգույն մազեր սիրողները: Դրեք այստեղ, ասում է, ձեր սիրած աղջկա նկարագիրը: Այդպես էր և իմ սիրած աղջիկը: Ուրեմն, ասում է, կարող եք երևակայել, թե որքան սիրուն էր նա»:

ՄԱՐԳԱՐՅԱՆ. Բռա՛վո, այդ լավ բաներ ես իմացել: Բայց ի՞նչպես պատահեց այդ բանը: Դու ինձ ոչինչ չես ասել:

ՄԻՍԱԿՅԱՆ. Ի՞նչը ինչպես պատահեց:

ՄԱՐԳԱՐՅԱՆ: Այսինքն՝ ի՞նչպես եղավ, որ նշանվեցիր: Պատմիր մանրամասնորեն:

ՄԻՍԱԿՅԱՆ. Մանրամասնություններ կա՞ն, որ պատմեմ: Պատահեց հանկարծ, ինքս էլ չիմացա ինչպես: Ա՛յ, ինչպես պատահեց: Անցյալ շաբաթ փողոցում հանդիպեց հանգուցյալ հորս հին բարեկամներից մեկը, որ մի ժամանակ գավառական պրիստավ էր և այժմ ծառայում է այստեղ, չգիտեմ որտեղ: Դու չես ճանաչիլ: Մովորական հարց ու փորձից հետո հարցրեց ամուսնացա՞ծ եմ:

Ասացի՛ չէ: Ասաց՛ կուգե՞ս քեզ համար մի լավ աղջիկ ճարեն: Ասացի՛ ինչո՞ւ չեն ուզիլ: Կատակով, գիտե՞ս: Ասաց՛ լավ: Ու գնաց: Հետո, երեկ դարձյալ հանդիպեց: Ասաց՛ դե՛հ, պատրաստվիր, որ էգուց երեկոյան պետք է գամ քեզ տանեն նշան տալու, մի լավ աղջիկ են ճարել՝ ասաց: Ասացի՛ լավ: Էլի կատակով, գիտես, որովհետև նրա ասածները ես կատակի տեղ էի ընդունում: Բայց կարող ես երևակայել զարմանքս, որ երեկոյան ճիշտ որ եկավ ինձ մոտ ու ասաց՛ դեհ, վերկաց գնանք: Ո՞ր, ասում են: «Նշան տալու» ասում է: Թողեք ի սեր աստժո, ասում են ես ամուսնանալու միտք չունեն: Չէ՛ որ չէ, կպավ ու պոկ չեկավ: Այստեղ միայն հայտնեց, որ յուր աղջիկն է ուզում ինձ տալ: Խո գիտես, որ ես թեև հիմար եմ, բայց շատ չեմ հիմար: Մտածեցի՛ տո՛, չլինի՛ թե սա փտած աղջիկ ունի և ուզում է սաղացնի ինձ վրա: Լավ, ասացի, ես այստեղ մի բարեկամ ունեմ, քեզ համար էի ասում, թողեք նրան էլ հետս վերցնեն: «Ուզում ես տասր բարեկամ բեր» ասաց: Բայց հետո ես ինքս հրաժարվեցի այդ մտքից, որովհետև մտածում էի, թե բանն անհաջող գնար, էլ ո՞վ կպրծներ քո ծաղր ու ծանակից: Այդ պատճառով քեզ իմաց չտվի ու մենակ գնացի: Ճանապարհին ամենայն դեպս երկու մատանի առա ու գնացինք: Ոչ որ չկար. ես էի, աղջիկը և հայրն ու մայրը: Ասենք հայրն ու մայրը նրա ծնողները չեն:

ՄԱՐԳԱՐՅԱՆ. Ի՞նչպես թե նրա ծնողները չեն:

ՄԻՍԱԿՅԱՆ. Նրա ծնողները չեն, էլի՛:

ՄԱՐԳԱՐՅԱՆ. Ուրեմն աղջիկը նրանց որդեգրուի՞ն է:

ՄԻՍԱԿՅԱՆ. Չէ, օրինավոր գավակն է:

ՄԱՐԳԱՐՅԱՆ. Ի՞նչ ես ասում, տո՛, խելքդ գլխիդ է՞: Ի՞նչպես թե հայր ու մայրը աղջկա ծնողները չեն և, միևնույն ժամանակ, աղջիկը նրանց օրինավոր գավակն է:

ՄԻՍԱԿՅԱՆ. Ա՛յ, ինչպես: Սառան աներոջս խորթ գավակն է: Այսինքն՝ աներս յուր այժմյան կնոջից առաջ ունեցել է մի կին, և Սառան այդ կնոջից է, բայց ուրիշ ամուսնուց, որի մահից հետո նա, այսինքն՝ Սառայի իսկական մայրը, ամուսնացել է աներոջս հետ, իսկ հետո ինքն էլ, այսինքն Սառայի իսկական



մայրը, վախճանվել է, և նրա խորթ հայրը, այսինքն՝ աներս, ամուսնացել է յուր այժմյան կնոջ հետ: Հասկացա՞ր:

ՄԱՐԳԱՐՅԱՆ. Դու մի բարդ խնդիր դրիր առաջս, որից գլուխս կկտրեմ, թե մարդ առանց թուղթ ու մատիտի բան կարողանա հասկանալ: Ի՞նչնիցն: Հետո՞:

ՄԻՍԱԿՅԱՆ. Հետո նշան տվի, է՛լի: Հետո նստեցինք ընթրելու: Կերանք, խմեցինք: Քո կենացն էլ անուշ արինք իբրև խաչեղբոր, որովհետև այնտեղ վճռեցի, որ խաչեղբայրս դու պետք է լինես:

ՄԱՐԳԱՐՅԱՆ. Շատ շնորհակալ եմ այդ պատվի համար: Բայց դու պատմիր՝ ի՞նչպես ծանոթացար աղջկա հետ: Ի՞նչ խոսեցիր: Ի՞նչպես հանկարծ սիրահարվեցիր նրա վրա, վերջապես ի՞նչպես հայտնեցիր սերդ:

ՄԻՍԱԿՅԱՆ. Ես նրան սեր չեմ հայտնել:

ՄԱՐԳԱՐՅԱՆ. Հապա՞:

ՄԻՍԱԿՅԱՆ. Հապա չկա: Ուղղակի՝ ասացի՝ «Օրիորդ, ես ձեզ հավանում եմ. եթե դուք էլ ինձ եք հավանում, ապա ընդունեցեք այս մատանին»: Նա էլ ընդունեց:

ՄԱՐԳԱՐՅԱՆ. Ընդունելիս ի՞նչ ասաց:

ՄԻՍԱԿՅԱՆ. Ոչինչ:

ՄԱՐԳԱՐՅԱՆ. Անխո՞ս ընդունեց:

ՄԻՍԱԿՅԱՆ. Անխոս: Միայն շատ պինդ-պինդ նայում էր աչքերիս: Առհասարակ նա ինձ հետ ամենևին չի խոսել, միայն շարունակ պինդ-պինդ նայում էր աչքերիս:

ՄԱՐԳԱՐՅԱՆ. Այ տնաքանդ, որ հետդ ամենևին չէ խոսել, էլ ո՞րտեղից գիտես, թե խելոք աղջիկ է, այն էլ քեզնից ու ինձնից էլ խելոք:

ՄԻՍԱԿՅԱՆ. Հայացքից, հետո հոնքերից գիտեմ: Գիտե՞ս, նա մի տեսակ հոնքեր ունի. այնքան մոտիկ են իրար, որ կարծես միացած են իրար հետ: Հետո մատներից տեսա, որ խելոք է:

ՄԱՐԳԱՐՅԱՆ. Ի՞նչ...

ՄԻՍԱԿՅԱՆ. Մատներից: Մատները բարակ և շատ երկար են:

ՄԱՐԳԱՐՅԱՆ. Եվ քո կարծիքով, բարակ ու երկար մատները խելքի նշա՞ն են:

ՄԻՍԱԿՅԱՆ. Չգիտեմ առհասարակ ինչպես է լինում, բայց նրա վերաբերմամբ այդ եզրակացությանն եկա:

ՄԱՐԳԱՐՅԱՆ. Շատ բարի: Շարունակի տեսնենք հիմարաբանություններիդ թելը որտեղ է կտրվում:

ՄԻՍԱԿՅԱՆ. Հետո, երբ մենք սեղան նստեցինք, նա գնաց քնելու:

ՄԱՐԳԱՐՅԱՆ. Ո՞վ:

ՄԻՍԱԿՅԱՆ. Սառան:

ՄԱՐԳԱՐՅԱՆ. Ի՞նչ ես ասում, տո՛ւ:

ՄԻՍԱԿՅԱՆ. Աստված է վկա:

ՄԱՐԳԱՐՅԱՆ. Եվ դու այդ շատ սովորական բա՞ն համարեցիր:

ՄԻՍԱԿՅԱՆ. Ի՞նչ է որ:

ՄԱՐԳԱՐՅԱՆ. Նա գնաց քնելու, և դու այդ բանում ոչ մի ցույց չնկատեցի՞ր քո դեմ:

ՄԻՍԱԿՅԱՆ.- Ցո՞ւյց: Ի՞նչ ցույց: Երևի քունը տանում էր, որ գնաց քնելու: Կամ, գուցե, քնելու չգնաց: Չգիտեմ: Միայն այլևս չերևաց:

ՄԱՐԳԱՐՅԱՆ. (Թոթվում է ուտերը տարակուսանքով): Ա՛յ, տարօրինակ մարդ... Այնպես հանգիստ պատմում է, որ կարծես թե այդ այդպես էլ պետք է լիներ:

ՄԻՍԱԿՅԱՆ. Ճիշտ է, ինձ էլ մի քիչ տարօրինակ թվաց այդ բանը, բայց հայրն ասաց, որ նա այդպիսի տարօրինակություններ շատ ունի և չպետք է ուշադրություն դարձնել:

ՄԱՐԳԱՐՅԱՆ. Եվ դու էլ ուշադրություն չես դարձրել, իհարկե: Թեև ասում ես, թե շատ չես հիմար: Գարեգին, բայց շատ ես հիմար, է՛, շա՛տ: Որք ու անտեր մեծացել ես, բան չես տեսել, կանանցից հեռու ես պահել քեզ և հիմա խելքահան ես եղել առաջին պատահած աղջկա վրա, չնայելով որ հետո ոչ խոսել է և ոչ էլ մոտո՞ղ նստել, որ նայես տեսնես, թե ինչ բան է:

ՄԻՍԱԿՅԱՆ. Ոչ, սխալվում ես, Միքայել. աստված է վկա, սխալվում ես: Նա առաջին պատահած աղջիկներից չէ: Ճշմարիտ է, հետո ոչ խոսել է և ոչ էլ մոտս կարգին նստել, բայց... ուրիշ տեսակ աղջիկ է, շատ ուրիշ տեսակ... ես զգում եմ, որ ուղղակի կպաշտեմ նրան:

ՄԱՐԳԱՐՅԱՆ. (Վեր է կենում): Լավ, վեր կաց գնա, ուշ է, ես պետք է պարապեմ: Քեզ որ թողնենք, ո՞վ գիտե՞ ուրիշ ինչ հիմարություններ դուրս տաս: (Միսակյանը վեր է կենում և վերցնում գլխարկը): Սպասիր: Տար ծանոթացրու ինձ հարսնացուիդ հետ: Գուցե գնացել ոտով-գլխով ծուղակն ես ընկել: Մեկ ես էլ տեսնեմ ով է, ինչ է: Ամուսնությունը խո հեշտ բան չէ՞: Կտանե՞ս:

ՄԻՍԱԿՅԱՆ. Ինչո՞ւ չեմ տանիլ: Ես իսկապես դրա համար էլ եկա քեզ մոտ: Ուզում էի խնդրեմ, որ վաղը միասին գնանք:

ՄԱՐԳԱՐՅԱՆ. Վաղն ի՞նչ է, շաբա՞թ: Լավ վաղն երեկոյան, ժամը ութին, սպասիր ինձ, կգամ, միասին կգնանք:

ՄԻՍԱԿՅԱՆ. Շատ բարի, կսպասեմ: (Դուրս է գնում. Մարգարյանը ձանապարհ է դնում նրան):

### ՏԵՍԻԼ III

ՄԱՐԳԱՐՅԱՆ. (Վերադառնալիս հանկարծ նկատում է անկյունում Թուսյանի գլխարկը, վերարկուն և ճամպրուկը): Այս ի՞նչ է: (Վերցնում է գլխարկն ու վերարկուն և նայում, հետո դիտում ճամպրուկը, ավելի ու ավելի զարմանալով): Ո՞ւմն է: (Գլխարկն ու վերարկուն ձգում է ճամպրուկի վրա ու շտապով դուրս գնում: Կարճ ժամանակից հետո վերադառնում է Թաթոսի հետ, որին վեր է կացրել քնից): Բավական է, որ գլուխդ դրիր՝ ու պրծավ: Շորերդ էլ չես հանում երեխի պես: (Ցույց տալով Թուսյանի իրեղենները): Այս ո՞ւմն է:

ԹԱԹՈՍ. Ղոնաղինը:

ՄԱՐԳԱՐՅԱՆ. Ի՞նչ ղոնաղ:

ԹԱԹՈՍ. (Գլխով ցույց տալով ննջարանի դուռը): Հրեն ընտեղ:

ՄԱՐԳԱՐՅԱՆ. Ո՞րտեղ, քնա՞ծ ես:

ԹԱԹՈՍ. Ընտեղ ա, է՛լի, ղոնաղը: Բա տեհել չե՞ս:

ՄԱՐԳԱՐՅԱՆ. Ի՞նչ է ասում: (Հետաքրքրված վերցնում է լամպը մտնում է ննջարան և կարճ ժամանակից հետո վերադառնում է զարմացած): Ո՞վ է: Ի՞նչ մարդ է: (Լամպը դնում է տեղը):

ԹԱԹՈՍ. Դե որ քու ղոնաղին դու ճանաչում չես, ես որդիան իմանամ:

ՄԱՐԳԱՐՅԱՆ. Դեմքը ծանոթս գալիս է, բայց միտս չի գալիս ով է: Անունը չհայտնե՞ց:

ԹԱԹՈՍ. Չէ:

ՄԱՐԳԱՐՅԱՆ. Ե՞րբ եկավ:

ԹԱԹՈՍ. Ես հլա զարթուն էի:

ՄԱՐԳԱՐՅԱՆ. Ի՞նչ ասաց, որ եկավ:

**ԹԱԹՈՍ.** Ի՞նչ պիտի ասի, քեզ էր հարցնում: Ասեց դո՞ւնաղ եմ եկել: Մտավ նստեց ըստեղ, մի հատ լափշին հանիլ տվեց, մագոլ ունեմ՝ ասում ա: Եննա ուտելու գատ ուզեց, չայ ուզեց, ասի կողպած ա: Եննա ասեց քունս տանում ա. ասի՝ որ ըտենց ա, քնի: Նա էլ գնաց քնեց: Ասեց՝ աղեղ որ գա, վերկացրու:

**ՄԱՐԳԱՐՅԱՆ.** Դե գնա վերկացրու: Ջարմանալի բան. ո՞վ կարող է լինել...

**ԹԱԹՈՍԸ** մտնում է ննջարան: Կարճ ժամանակից հետո այնտեղից քնաթաթախս և շտապով դուրս է գալիս Թուսյանը՝ մի հատ կոշիկը հանած: Թաթոսը դուրս է գալիս նրա ետևից:

#### ՏԵՍԻՆ IV

**ԹՈՒՍՅԱՆ.** Ա՛, դու արդեն եկե՞լ ես: (Գրկում է Մարգարյանին և համբուրում նրա շրթունքները): Ներողություն, պատկել էի մահճակալիդ վրա, որ մի քիչ հանգստանամ: Վլադիկավկազից սկսած՝ բեռնակիր ֆուրգոնով եմ եկել. կողքերս ջարդ ու փշուր արեց անիծածը: Ո՞նց ես, լա՞վ ես:

**ՄԱՐԳԱՐՅԱՆ.** (Կանգնած է մասամբ զարմացած, մասամբ շփոթված): Ներողություն... ձեր դեմքը ծանոթս գալիս է, բայց չեմ կարողանում հիշել...

**ԹՈՒՍՅԱՆ.** Մի՞թե: (Ծիծաղում է) Թուսյանը չե՞մ... Ռուբեն Թուսյանը... Միասին չէինք սովորո՞ւմ դպրոցում... Անունս էլ որ դրել էիք «սատանի ճուտ»...

**ՄԱՐԳԱՐՅԱՆ.** (Հանկարծ հիշելով, ձեռքը խփելով ճակատին): Ա՛խ ճիշտ որ... Ռուբեն Թուսյան...

**ԹՈՒՍՅԱՆ.** Դե որ հիշեցիր, մեկ էլ պռոշտի անենք: (Ծիծաղելով համբուրվում են):

**ՄԱՐԳԱՐՅԱՆ.** Բայց դու այնքան փոխվել ես...

**ԹՈՒՍՅԱՆ.** Տնաշեն, բաս այս երկար ու ձիգ տարիների ընթացքում մարդ չի փոխվի՞լ..., մանավանդ արևելցին, որ այսօր տեսնում ես մագ չկա երեսին, իսկ վաղն արդեն արջի պես մագակալել է: Թաթոս ջան, քե մատաղ, տես ոտնամանս

ընտեղ կլի, բի հագնեն: (Նստում է բազկաթոռի վրա: Թաթոսը գնում է կոշիկը բերելու): Մի անտեր մագոլ ունեն... ա՛յ, հենց այստեղ (ցույց է տալիս ոտքի ճկույթը), հոգիս բուկս բերեց: Կտրում եմ, էլի դուրս է գալիս:

Թաթոսը բերում է կոշիկը, տալիս է Թուայանին և դուրս է գնում ձախ դռնից:

## ՏԵՍԻԼ V

ԹՈՒՍՅԱՆ. Մեր տղա, ոնց որ տեսնում եմ վատ չես ապրում, ա՛յ: (Սկսում է կոշիկը հագնել): Ու դեռ ասում ես, թե գրող ես:

ՄԱՐԳԱՐՅԱՆ. Հա, գրելով չէ, որ ապրում եմ...

ԹՈՒՍՅԱՆ. (Չարչարվելով կոշիկի վրա, որը դժվարությամբ է մտնում): Բա՞ս:

ՄԱՐԳԱՐՅԱՆ. Ծառայում եմ:

ԹՈՒՍՅԱՆ. Հա՛: Ես էլ ասում եմ ախր... Ա՛յ, անտեր մնաս, թե մտնես, հը՛: Էս գահրումար մագոլն էլ հոգիս հանեց: (Վերջապես հագնում է կոշիկը և վերկենում): Ինչ եմ ասում, Մարգարյան: Ուզես չուզես՝ քո հյուրն եմ: Շատ չէ, մի քանի օր, մինչև տանից պատասխան գա: Փողս այնպես հատել է, որ ոտներիցս կախես՝ մի սև գրոշ չի ընկնիլ գրպանիցս: Ինչպես ուզում ես՝ հաշվիր:

Պետերբուրգից մինչև այստեղ երեք տեղ պարտ եմ վերցրել. ոսկե ժամացույցս էլ գրավ եմ դրել: Գնում եմ տուն: Հայրս մեռնում է. գրել էր, որ հոգուն վրա հասնեն ու փող չէր դրրկել: Թե որ Սարումյանը չպատահեր, ստիպված պիտի լինեի ուղղակի փողոցում գիշերելու: Նա ասաց, որ ինքը տնփեսա է, հարմարություն չունի ինձ յուր մոտ տանելու, մի խոսքով՝ գլխից ռադ արավ ու բերեց քեզ մոտ: Տեսնում ես, ես մեղավոր չեմ. թե նեղանալու ես, նրանից նեղացիր:

ՄԱՐԳԱՐՅԱՆ. Ինչո՞ւ պիտի նեղանամ:

ԹՈՒՍՅԱՆ. (Ծիծաղելով): Ես ի՞նչ գիտեմ: Ես մի քիչ աներես մարդ եմ:

Սկզբում մտադիր էի իջնել ոմն... (Ծոցից հանում է մի նամակ և նայում հասցեին) ոմն Հակոբ Բաղիրյանի մոտ... Ո՞վ է այս պարոնը, ճանաչո՞ւմ ես:

ՄԱՐԳԱՐՅԱՆ. Հակոբ Բաղիրյա՞ն... Չեմ ճանաչում:

ԹՈՒՍՅԱՆ. Սկզբում ուզում էի սրա մոտ իջնել, գնացի ման եկա, ման եկա, չգտա: Էզուց, երևի, հարկ կլինի էլի թրև գալու սրա ետևից:

ՄԱՐԳԱՐՅԱՆ. Այդ ի՞նչ նամակ է:

ԹՈՒՍՅԱՆ. (Նամակը ծոցը դնելով): Պետերբուրգումն են տվել: Գրողն ինձ պես մի շուն-շանորդի է: Հորից փող էր գողացել, մի քանի հազար, և փախել մի կնոջ հետ: Հիմա փողը հատել է, դիմում է այս Բաղիրյանին, սրա քրոջ որդին է, ինչ է, չգիտեմ, որ հոր սիրտը փափկացնի: Ինձ էլ փող է պարտ հարամզաղեն... Բայց ինչ են ասում, Մարգարյան, ես քաղցած եմ ախր: Թաթոսն ասաց, որ ամեն բան կողպած ես պահում:

ՄԱՐԳԱՐՅԱՆ. Այո, որովհետև բաց որ թողնում եմ՝ մաքրագարդում է:

ԹՈՒՍՅԱՆ. Դե, հիմա բեր ես մաքրագարդեմ: Գիտե՞ս, մի առանձին բան հարկավոր չէ, մի քիչ հաց ու պանիր, մի քիչ ձկից-մկից, մի քիչ խոզի միս, թե որ ունես: Մի քիչ էլ որ գինի արաղ լինի, վնաս չի տալ, ծարավել եմ:

ՄԱՐԳԱՐՅԱՆ. (Գնում է ծառային պատվեր տալու և կարճ ժամանակից վերադառնում է): Պետերբուրգում ի՞նչ էիր շինում: Նստիր:

ԹՈՒՍՅԱՆ. (Նստելով): Ուսանում էի համալսարանում:

ՄԱՐԳԱՐՅԱՆ. Ավարտեցի՞ր: (Վառում է կլոր սեղանի լամպը և ինքն էլ նստում):

ԹՈՒՍՅԱՆ.- Չէ՛, հա՛:

ՄԱՐԳԱՐՅԱՆ.- Բա՞ս:

ԹՈՒՍՅԱՆ. Վոնդեցին:

ՄԱՐԳԱՐՅԱՆ. Ինչո՞ւ:

**ԹՈՒՍՅԱՆ.** Ավելի լավ է՝ չհարցնես... Այս էլ ասեմ, որ բան չէի սովորում: Դու ինձ ասա՝ կանանց ու կարտի ետևից ընկնողը գիտության գլուխ կունենա՞: Պրոֆեսորներիցս մեկն ինձ ասաց, որ ես կամ մեծ մարդ կդառնամ, կամ ամենամեծ պաղլեցր: Հավանականը երկրորդն է, իհարկե... Չե՞ս ծխում:

**ՄԱՐԳԱՐՅԱՆ.-** Չէ:

**ԹՈՒՍՅԱՆ.** Բա ոնց անենք, որ պապիրոս չունեն:

**ՄԱՐԳԱՐՅԱՆ.** Բերել կտամ: Լավ, հիմա ի՞նչ երեսով պետք է տուն գնաս:

**ԹՈՒՍՅԱՆ.** Դե մի շան կաշի կառնեմ, կկպցնեմ երեսիս թե որ պակաս է: (Ծիծաղում է): Ասենք, մերոնք կարծում են, թե դեռ սովորում եմ: Բայց հայրս՝ չէ: Նա շուն է: Բանից տեսնում եմ, որ նա արդեն կասկածում է և մեռնելու պատրաստություն տեսնելն էլ մի մանյովր է նրա կողմից, որ ինձ հալա մեկ տուն քարշ տա: Դրա համար վերջին ժամանակներս շատ դժվարությամբ էր փող դրկում, իսկ վերջին նամակի հետ խո, ինչպես ասացի, մի կոպեկ չէր դրկել: Բայց մեկ էլ ասում եմ՝ գուցե իսկապես մեռնում է, գնամ: Բան-ման ունի, կարող է շներոց-գելերոց լինել: (Կանչում է): Ադա, Թաթո՛ւ, դե բի, է՛, ես մեռա ախր:

Թաթոսը մտնում է մատուցարանով, որի վրա կա սառը մսեղեն, ձկնեղեն, պանիր, հաց, աղ, մի շիշ գինի, մի շիշ օղի: Բաժակներ, դանակ, պատառաքաղ և անձեռոցիկ:

## ՏԵՍԻԼ VI

**ՄԱՐԳԱՐՅԱՆ.** (Լամպը և ալբոնը ետ է քաշում): Դիր այստեղ և գնա պապիրոս բեր: (Թուսյանին): Ի՞նչ պապիրոս ես ծխում:

**ԹՈՒՍՅԱՆ.** Ողջ մեկ է: Թաթոս ջան, կասես՝ Կուշնարյով, 25 կոպեկանոց.

Մարգարյանը փող է տալիս Թաթոսին: Թաթոսը դուրս է գնում:

## ՏԵՍԻԼ VII



ԹՈՒՍՅԱՆ. (Օղի է ածում): Քո կենացը: (Խմում է և սկսում ազահաբար ուտել):  
Դու չե՞ս ուտում:

ՄԱՐԳԱՐՅԱՆ. Ես առհասարակ չեմ ընթրում: Դու կեր, ինձ մի նայիր:

ԹՈՒՍՅԱՆ. Դե, արադից, գինուց...

ՄԱՐԳԱՐՅԱՆ. Ես ճաշին եմ միայն խմում:

ԹՈՒՍՅԱՆ. Մի բաժակ արադն ի՞նչ է որ... (Օղի է ածում և առաջարկում Մարգարյանին): Առ:

ՄԱՐԳԱՐՅԱՆ. Դե, որ ուզենամ, կխամեմ, էլի՛:

ԹՈՒՍՅԱՆ. Դու գիտես: Այս էլ իմ կենացը: (Խմում է և շարունակում ուտել: Միջոց): Կուզե՞ս ասեմ՝ այս բոլորիս ինչ ես մտածում:

ՄԱՐԳԱՐՅԱՆ. Ի՞նչ:

ԹՈՒՍՅԱՆ. Մտածում ես. «Էս հարամզադեն համ իմ հյուրն է, համ էլ ինքն է թավազա անում»: Չէ՞: (Մարգարյանը ծիծաղում է): Տեսա՞ր, որ չսխալվեցի: Ինչ ուզում ես՝ ասա. անմիտ սովորություններով լի է մեր կյանքը: Այդպիսի սովորությունների կարգը պետք է դասել, անշուշտ, և մի կողմից հյուր լինելու, մյուս կողմից հյուր պատվելու կեղծավոր ցերեմոնիաները: Մի կողմից՝ չեմ ուզում, ջեբս դիր, մյուս կողմից՝ անուշ արա, քթովդ դուրս գա: Մի բան, որով ես պարծենում եմ, այդ ա՛յն է, որ ոչ մի բանից չեմ քաշվում: Ամոթ ասված բանն առհասարակ ինձ համար գոյություն չունի: Գրագի համար շորերս կհանեմ և ցափ-տկլոր դուրս կգամ փողոց:

ՄԱՐԳԱՐՅԱՆ. Իբր թե՞:

ԹՈՒՍՅԱՆ. Աստված է վկա:

ՄԱՐԳԱՐՅԱՆ. Մի ընկեր ունեմ, մի քիչ առաջ նա այստեղ էր, երբ որ մի շատ հիմար բան է ասում և տեսնում է, որ չեմ հավատում, իսկույն աստծուն վկա է

կանչում: Բայց նա հավատում է աստծուն, իսկը դո՞ւ:

ԹՈՒՍՅԱՆ. Ի՞նչ, չլինի՞ կարծում ես աթեիստ եմ: Չէ՛. ես այդպիսի դատարկ բաների վրա ուղեղս չեմ հոգնեցնում: Ասում են աստված կա, ուրեմն կա:

ՄԱՐԳԱՐՅԱՆ. Բայց ասում են, որ չկա:

ԹՈՒՍՅԱՆ. Ուրեմն չկա:

ՄԱՐԳԱՐՅԱՆ. Բայց այս բոլորին աստծուն վկա բերիր և ասացի՛ր, որ աթեիստ չես:

ԹՈՒՍՅԱՆ. Ուրեմն՝ կա: Բայց թողնենք այս. սա սովորություն է: Փիլիսոփաների մեջ, իմ կարծիքով, ամենից խելոքը Էպիկուրն էր. խլիր կյանքից ա՛յն ամենը, ինչ որ հաճելի է քեզ և ինչ որ կարող ես, և ոչ մի բանի մասին մի մտածիր: Մտածողությունն առհասարակ, այդ հաստատված է բժշկական գիտությամբ, վնաս է ստամոքսին, լավ ստամոքսը, ինչպես հայտնի է, մարդու օրգանիզմի ամենակարևոր օրգաններից մեկն է:

ՄԱՐԳԱՐՅԱՆ. Այդ պատճառով նույն բժշկական գիտությունն ասում է, որ ուտելիս շատ չպետք է խոսել, որովհետև խոսելու համար պետք է մտածել, իսկ մտածողությունը, ինչպես ինքդ ասացիր, վնաս է ստամոքսին: (Օհժաղում է):

ԹՈՒՍՅԱՆ. Թե որ ինձ համար ես ասում, ես քնած ժամանակն էլ եմ խոսում, անհոգ կաց: Մյուս կողմից, բանի նման չէ, որ ես սուս ու փուս ուտեմ, և դու միմիայն թամաշա անես: (Գինի է ածում): Խմենք այս նրանց կենացը, որոնք այնքան խելոք են, որ աստծու գոյության խնդրով չեն զբաղվում: (Խմում է): Գիտե՞ս ինչ կա, Մարգարյան: Ես, թեև ատելով ասում եմ փիլիսոփայությունն ու առհասարակ իբրև «ПЛЕННОЙ МЫСЛИ РАЗДРАЖЕНИЕ», ինչպես ասում է բանաստեղծը, բայց և այնպես ինքս մասամբ փիլիսոփա եմ, այսպես ասած՝ Էպիկուրյան կարգի փիլիսոփաներից: Եվ իմ այդ կարգի փիլիսոփայական ուղեղով ես հսկայական հիմարներ եմ համարում առհասարակ այն մարդկանց, որոնք ներկան գոհում են ապագայի համար: Մի ընկեր ունեմ ուսանողներից, գրպանում որ մի մանեթ ունենա, մի կոպեկ չի ծախսիլ. ասում է՝ վաղը քաղցած

կմնամ, բայց մոռանում է, որ այսօր քաղցած է մնում: Քերականության միջից պետք է ջնջել ապառնի ժամանակը: Ապագա չկա, որովհետև անհայտ է, այդ մասին մտածելն ու հոգալը բնականաբար, հիմարություն է: Բացի դրանից դա անվստահության, վախկոտության նշան էլ է. մի գուցե, եթե այսօր այսպես անեն, վաղն այնպես լինի, ու այսօր չեն անում ա՛յն, ինչ որ իրենց սիրտը ցանկանում է: (Գինի է խմում):. Ի՞նչ է կյանքը: Կամ, ավելի ճիշտ ի՞նչ պետք է լինի կյանքը. բոլորական հաճույք է: Է՛հ, երբ որ սրտիդ այս բոլորի թելադրածը չես անում ինչ-որ վաղվան հաշիվներով, էլ ինչո՞ւ ես ապրում: Այդպիսով, իբր թե խոհեմությամբ, ա՛յ, մի ուրիշ բառ, որ նույնպես չեմ հասկանում, իբր թե խոհեմությամբ, բայց իսկապես վախկոտությամբ, միշտ չես անիլ այն, որ ցանկանում ես անել, միշտ կգսպես քեզ, իսկ հետո, մեկ էլ տեսար մեռել ես: Մահվան գաղափարը խելացի մարդու համար մեծ խթան պետք է լինի ամեն բան անելու, այսինքն ա՛յն ամենը, ինչ որ իրեն հաճելի է: Այսօր թե վաղը պետք է մեռնեն, չէ՞, է՛հ, երբ որ այդպես է, ինչո՞ւ չանեն այն, ինչ որ ուզում եմ և ինչ որ կարող եմ անել այս բոլորին: Ես դեռ կանեմ, հետո հե՛րն անիծեմ, ինչ ուզում է՝ պատահի: Կրկնում եմ՝ փիլիսոփաների մեջ ամենից խելոքը Էպիկուրն էր. խլիր կյանքից ա՛յն ամենը, ինչ որ հաճելի է քեզ և ինչ որ կարող ես, և ո՛չ մի բանի մասին մի մտածիր: (Գինի է ածում): Այս էլ աստված լուսավորի նրա հոգին: (Խմում է):

**ՄԱՐԳԱՐՅԱՆ.** Բայց դու սխալվում ես: Էպիկուրն այդպիսի բան չի ասել, դու միայն կրկնում ես ստոիկների գրպարտությունը նրա դեմ:

**ԹՈՒՍՅԱՆ.** Ի՞նչպես:

**ՄԱՐԳԱՐՅԱՆ.** Ամենից առաջ պետք է նկատեն, որ քո հավանած այդ փիլիսոփան գործ էր ածում ամենահասարակ կերակուր, այն էլ չափավոր կերպով, և խմում էր միայն ջուր, իսկ դու այնքան ուտում ես ու խմում, որ քիչ է մնում ինձ էլ կուլ տաս: Այդ մարմնականը, իսկ...

**ԹՈՒՍՅԱՆ.** (Ծիծաղում է): Հոգուդ մատաղ, սպասիր, էքստրա քո կենացը խմեմ հաշող նկատողությանդ համար: (Գինի է խմում): Այդ մարմնականը: Հետո՞...

ՄԱՐԳԱՐՅԱՆ. (Շարունակելով): Այդ մարմնականը: Իսկ հոգեկան-բարոյականը... ճիշտ է, Էպիկուրը պնդում էր, թե երջանկությունը հաճույքի մեջ է, բայց ամեն մի հաճույք վայելելուց առաջ ամենախիստ քննության էր ենթարկում հետևանքը, որովհետև կան հաճույքներ, որոնց հետևանքը միշտ դառն է լինում: Պահեցողություն և ինքնագազազվածություն ահա իսկապես Էպիկուրի վարդապետությունը, և ոչ թե անսահման սանձարձակություն, ինչպես դու ես հասկանում:

ԹՈՒՍՅԱՆ. շերն անիծեմ, չեմ վիճում: Բայց այդ ավելի վատ նրա անվան համար, եթե նա այդպես չէ քարոզել, ինչպես ես եմ հասկացել: Ուրեմն՝ Էպիկուրից ավելի խելոքը նրա՛նք են, որոնք նրա վարդապետությանն իմ հասկացած բացատրությունն են տվել:

Թաթոսը բերում է ծխախոտը և դնում Թուսյանի առաջ:

## ՏԵՍԻՆ VIII

ԹՈՒՍՅԱՆ. Ա՛յ դոչադ Թաթոս, ա՛յ, լավ Թաթոս: (Գինի է ածում): Քո կենացը, Թաթոս: (Խմում է):

ԹԱԹՈՍ. Սադ ըլես, աղա: (Ուզում է գնալ):

ԹՈՒՍՅԱՆ. Յավաշ, ո՞ր ես գնում: (Գինի է ածում): Բա որ մարդու կենացը խմեն, շնորհակալություն չեն հայտնի՞: (Բաժական առաջարկում է նրան): Առ: (Թաթոսն անհամարձակորեն նայում է Մարգարյանին): Առ, է՛, ձեռք բեզարեց:

ՄԱՐԳԱՐՅԱՆ. (Թաթոսին): Առ խմիր:

ԹԱԹՈՍ. (Առնում է բաժակը): Շնորհակալ եմ, աղա: Աստված երգար կյանք տա քեզ: (Խմում է):

ԹՈՒՍՅԱՆ. (Բաժական առնելով նրա ձեռքից): Անուշ:

ԹԱԹՈՍ. Անուշ կենաս, աղա ջան:

**ԹՈՒՍՅԱՆ.** Հա՛, հմի ջան դառա, հա՛: Բա էն վախտը մի պատատ հաց ու պանիր չտվիր, որ ուտեմ: (Թաթոսը ծիծաղում է: Մարգարյանը նշանացի սաստում է նրան և հրամայում, որ դուրս գնա): Յավաշ, ո՞ր ես գնում: Արի հավաքի ըստոնք: Ինձ որ մտիկ տաս, ես լիս է լիս կնստեմ, ըսկի չեմ էլ ասի շնորհակալ եմ: (Մի ծխախոտ է վառում լամպի վրա): Տեսնում ես, աղեղ էլ նոթերը կիտել ա:(Ծիծաղում է և սկսում ծխելով ման գալ):

Թաթոսը վերցնում է մատուցարանը և դուրս տանում: Մարգարյանը վեր է կենում և գնում նստում գրասեղանի մոտ:

## ՏԵՍԻՆ IX

**ԹՈՒՍՅԱՆ.** Մարգարյան, ամուսնացած չե՞ս:

**ՄԱՐԳԱՐՅԱՆ.** Չէ:

**ԹՈՒՍՅԱՆ.** Դե որ այդպես է, ինչո՞ւ չես այս ախմախի տեղ (Թաթոսի հասցեին) մի քոծ պահում... (Մարգարյանը լռում է ակներև դժգոհությամբ: Միջոց): Դե, դու հիմա նստեցիր պարապելու, իսկ ինձ ո՞րտեղ կհրամայես շնթոկեմ:

**ՄԱՐԳԱՐՅԱՆ.** Այ, ուզում ես՝ այդտեղ քնիր (ցույց է տալիս գահավորակը), ուզում ես՝ այնտեղ (ցույց և տալիս ննջարանի դուռը), մահճակալիս վրա:

**ԹՈՒՍՅԱՆ.** Չէ, ախպեր, քո մահճակալը թող քեզ մնա, ես վեր կընկնեմ այստեղ: Այսքան ուտել խմելուց հետո գուցե մի քիչ խոնվացնեմ, բայց վնաս չունի, մուգիկով պարապելը քեզ համար, կարծեմ, ավելի հաճելի կլինի: (Ծիծաղում է):

Մարգարյանը վեր է կենում և գնում ննջարան, որտեղից դուրս է բերում մի բարձ, վերմակ ու սավան և ուզում է անկողին պատրաստել գահավորակի վրա:

**ԹՈՒՍՅԱՆ.** Դե հիմա թող, տեղաշորս ես կպատրաստեմ: Հալա օգնիր այս սեղանն այն կողմը քաշենք: (Սեղանը հեռացնում է գահավորակից): Բայց ինչ եմ ասում, Մարգարյան, էգուց ինձ փող պետք է տաս, ուզում եմ մի հեռագիր տամ տուն: Հետո բոլոր շապիկներս կեղտաշոր են դարձել. տե՛ս (ցույց է տալիս

օճիքը), պետք է նորն առնել: Խայտառակություն է այսպես դուրս գնալը:

**ՄԱՐԳԱՐՅԱՆ.** Հապա ասում էիր, թե տկլոր էլ դուրս կգնա՞ս:

**ԹՈՒՍՅԱՆ.** (Ծիծաղում է): Դե, ասում էի, է՛լի... (Սկսում է անկողինը պատրաստել):

(Վարագույրն իջնում է)